

Soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfissineqarnissaannut Naalakkersuisut upernaakkut 2016-imi ataatsimiinnissamut inatsisissamik saqqummiinissaannik Inatsisartut aalajangiiffigissaattut siunnersuut.

(Inatsisartuni ilaasorta q Ane Hansen, Inuit Ataqatigiit)

Akissuteqaat

(Ineqarnermut, Sanaartornermut Attaveqaqatigiinnermullu Naalakkersuisoq)

Aappassaanneerpeqarnera

Aallarniutigalugu Inatsisartut Sanaartornermut Ataatsimiititaliaat isumaliutissiisummik saqqummiussinera pillugu qutsavigissavara. siunnersuut saqqummiunneqartoq aammalu oqaaseqaatit Ataatsimiititaliaq saqqummiussai Naalakkersuisunit tamakkiisumik tapersersinnaavavut.

Tamanna tunngavigalugu Naalakkersuisut ilisimatitsinissaannut pissutissaqalersitsivoq, Naalakkersuisut erngerlutik Aningaasanut Inatsisissami tulliuuttumi, Inatsisartut Aningaasaqarnermut Akileraartarnermullu Ataatsimiititaliaannut ilassutissatut aningaasaliissutinik, pingaarnertut konto pingaarnermi nammineerluni inissianut aningaasalersuinissamut aningaasaliissutinik siunnersuummi siunertarineqartunut atorneqartussanik missingersuutinut sunnuteqaanngitsunik nuussinissamut qinnuteqaammik saqqummiussiniarmata. Aningaasaliissutit taakku atorlugit nammineerluni illuutinik iluarsaassinermut aningaasartuutit 40 procentii tikillugit erniaqanngitsunik akilersugassaannngitsunillu taarsigassarsititsisoqarsinnaareerpoq.

Inatsisissatut siunnersuutip Inatsisartut upernaakkut ataatsimiinneranni saqqummiunneqarnissaminut angumersisinnaannginnera eqqarsaatigalugu, ilassutit aningaasaliissutissanik qinnuteqaammut peqatigitillugu oqaaseqaatissatut siunnersuummik, ataatsimiititaliaq taarsigassarsititsinissamut piunasaqaatit isummersuutit saqqummiussai tunngavigalugit soraarnerussutisialinnut pissakinnerusunut illuni namminneq najukkaminni aserfallatsaaliugassatut pisariaqartitaannut 150.000 koruunit tikillugit illu qularnaveeqqusiullugu erniaqanngitsunik akilersugassaannngitsunillu taarsigassarsititsinissamut Naalakkersuisunut piginnaatitsiviusumik Naalakkersuisut saqqummiussinialersaarput. Tassalu aqqissuussineq illunut nammineerluni pigisanut tamanut, tassalu BSU-mit taarsigassarsilluni illulianut, nammineerluni illulianut, sanaqateqarluni illulianut kiisalu illunut nalinginnaasunut atuutissaaq.

Naalakkersuisut siunnersuutip nassuiarneqarnerinut periarfissarititaasunullu oqaaseqaatit matuma siuliani saqqummiunneqartut tunngavigalugit siunnersuutip akuerineqarnissaa inassutigaat.